

Un altar fradèll

*L'è frésca l'aria stasira...
d'incens un prufümm
al vèn sü da dré du ra scesa,
purtaa d'un firapul da vènt
dal pertùn mèzz ambaa du ra gésa...
Al riva cu'l su ca sa sbassa
da dré dul Munt Rosa...
e sènti, in quel su ca sa smorza,
e in du l'acqua
dul lagh bèla néta,
sbiavi i me regòrd da tuséta.
In quéla,
tra 'l scür d'ul giardin,
védi lüsi una pianta da pin...
Hinn ciar da Natal!
Ariva 'l Bambin...
ed eccu, d'incant, a turnan i sogn,
a turni tuséta anmò 'n zichinin.
Quanto traffich inlura!
Ul cuur... ul da fa...
e mi ca speciavi 'l Bambin
cul fularmu d'un fiö piscinin!
Pö la vuus d'ul me pà:
sü, in lécc prést in stasira,
fee mia frecass,
la mama la spécia 'n fiurin...
stanocc forzi al nass!
E sees!... un altar fradèll!
Un regall, ma disevan:
ul Bambin püssee bèll!
Però, s'ho da veegh un fradèll
'mè 'n regall da Natal,
(a gh'ho dui al Signur
ca pregavi in sétùn:)
fa che sott a ra pianta
manìva d'ul pin,
poda truvà almenu 'n turùn,
dò nisciöör... e 'n quai mandarìn!*

Angela Menconi Ganna